

అపొస్తుడు ఆతి పవులు గలాతీయ ముటాదు మని దేవుణు సజమ్కాజ్ రాస్తి ఉత్తం

నెల్వు కిబిసినిక

అపొస్తుడు ఆతి పవులు గలతీయ ముటాదు మని దేవుణు సజమ్కాజ్ రాసిని ఉత్తరమ్నె యాక. గలాతీయ ముటాదు పవులునె సువార్త వెప్తోన్. వీరు నెగ్రెండనె క్రీస్తుజ్ నమ్మిజి వాజి మహార్. నస్తివలె సెగొండార్ నమ్మితి యూదురు, క్రీస్తు ముస్సు మని నమకమ్నె ఆవండ, యూదురి రూలుజ్ లోజిజి, సునతిబా కిబె ఆదెజ్ వలె ఇజి తవు బోద వరిజ్ వెప్తోన్. యా మాట వెహరె, విరి మన్సు అయా బోద దరోట్ మప్తార్. దినిజ్ దిదిజి పవులు రాసిని ఉత్తమ్నె యాక. ఒరెన్ సునతి కిబె ఆతిజ, దేవుణు ఎద్దు నీతి నిజాయితి మనికాన్ ఆవెన్. గాని యేసుప్రబు ముస్సు నమకం ఇట్టిజనె దేవుణు ఎద్దు నీతి నిజాయితి మనికాన్ ఆనాన్ ఇజి వెప్సినాన్. మరి, మాటు క్రీస్తుజ్ నమ్మితివలె డిబె ఆతి మని వరి లెకెండె మనాట్, అక్కు మని వరి లెకెండె మనాట్. రూలుజ అడిగి మన్ఎట్ ఇజి వెప్సినాన్. మరి, ఒడోల్దిది సెఇ ఆసెజ్ కిబిస్సి పణిజ్ ఇని ఇనికెజ్, దేవుణు ఆత్మ నడిః పిసిని వజ నడిఃనికాన్ ఎలాగ మంజినాన్ ఇజి బా వెప్సినాన్.

1-2 అపొస్తుడు ఆతి పవులు ఇని నాను, గలాతీయ ముటాదు మని దేవుణు సజమ్కాజ్ రాసిని ఉత్తం. సెగొండార్ నజి అపొస్తుడు ఇజి ఏర్పాటు కిత్తిజ్ నాను అపొస్తుడు ఆవత. ఒరెన్ లోకు నజి అపొస్తుడు ఇజి పోక్తిజ్ నాను అపొస్తుడు ఆవత. గాని యేసు క్రీస్తుని బుబ్బాతి దేవుణు నజి అపొస్తుడు ఇజి ఏర్పాటు కిత్తి పోక్తిజ్ నాను అపొస్తుడు ఆత. వాండ్రె యేసుక్రీస్తుజ్ సావుదాన్ మర్జి బత్తిస్తాన్. నానుని

నా వెట ఇబ్బె మని దేవుణుదిజ్ నమ్మితి తంబెరిబు, అబ్బె మని నజమ్కాణి విజెరిజ్ వెన్బాతి లెకెండ్ వెప్పినార్.

3 మా బుబ్బ ఆతి దేవుణుని ప్రబు ఆతి యేసుక్రీస్తు దయ దర్మమ్దాన్, మీరు నిపాతిదాన్ మండ్రెజ్ సాయం కిపిర్.

4 మాటు కిత్తి తప్పు పణిజ్ మజి తప్పిస్తెజ్, యా లోకమ్దు మని సెఇ బాణిజ్ డిస్సిస్తెజ్ క్రీస్తు మా పాపమ్క వందిజ్ వన్నిజ్ వాండ్రె ఒపజెపె ఆతండ్రె సాతాన్. మా బుబ్బ ఆతి దేవుణు ఎత్తు కిత్తి వజనె వాండ్రె యా లెకెండ్ మా వందిజ్ సాతాన్.

5 దేవుణుదిజ్ అంతు సిల్లెండ్రె ఎలాకాలం గవరం మనీద్. ఆమెన్.

సువార్త ఉండ్రె. మరి ఉండ్రె సిల్లెద్.

6 నిజమాతి సువార్త నమ్మితి వెనుక నిసా బేగి మీరు దేవుణుదిజ్ డిసి సీజనిదెర్ ఇజి నాను నండో బమ్మ ఆజిన. క్రీస్తు దయ దర్మమ్దాన్ మిజి సీజని కొత్త బత్తుదిజ్నె, దేవుణు మిజి కూక్టాన్. వన్నిజ్ డిస్సిదెరె, సువార్త ఇజి పేరు వెహె ఆజిని తపు బోదదు మన్ను ఇడ్రెజినిదెర్ ఇజి నాను నండో బమ్మ ఆజిన.

7 నాను నిజం వెప్పిన, అయాక క్రీస్తు వందిజ్ తోరిసి నెస్పిసిని సువార్త ఆఎద్. గాని సెగొండార్ మిజి పంర్ర కిబిసి, అయా సువార్త మారిస్తెజ్ సుడ్రెజినార్.

8 గాని అపొస్తురు ఆతి మాపునో, పరలోకమ్దాన్ వాతి దేవుణు దూతనో మరి ఎయెన్ ఆతిజ్బ, మాపు ముజాలె మిజి వెప్తి సువార్త ఆవండ్రె, దినిజ్ వెత్తెకం ఆతి సువార్త మిజి వెప్తిజు, దేవుణు సాయిపు వన్ని మున్ను ఎలాకాలం మనీద్.

9 మాపు ముజాలె మిజి వెప్తి లెకెండ్, ఏలు నాను మరి ఉండ్రె సుటుబా వెప్పిన. మా బాణిజ్ మీరు వెంజి, నమ్మితి సువార్త ఆవండ్రె, దినిజ్ వెత్తెకం ఆతి సువార్త మిజి ఎయెన్బా వెప్తిజు, దేవుణు సాయిపు వన్ని మున్ను మనీద్.

10 నాను యా లెకెండ్ వెప్పి లోకుర్ బాణిజ్ మెపు కోరిజినానా? దేవుణు బాణిజ్ మెపు కోరిజినానా? లోకురిజ్ సర్ద కిదెజ్

నుడఃజినానా? లోకురిజ్ సర్ద కిబిస్తైజ్ నాను నుడఃజినె మహిజ, నాను క్రీస్తుజ్ సేవ కినికాన్ ఆవండ మన.

దేవుణునె పవులుజ్ అపొస్తుడు ఇజి కూక్తాన్.

11 తంబెరిజాండె, నాను మిజి వెహ్తి సువార్త లోకు బాణిజ్ వాతిక ఆవద్ ఇజి నాను మిజి వెహ్తిన.

12 అయాక లోకు బాణిజ్ నజి దొహ్కొక్తిక ఆవద్. ఎయెన్బా నజి నెన్పిస్తిక ఆవద్. గాని యెసు క్రీస్తునె యా సువార్త నజి తోరిసి నెన్పిస్తాన్.

13 ఒరెన్ యూద వాండ్రు కిజిని లెకెండ యూదురి మతమ్ది రూలుజ్ విజు లోజిజి పటుదలదాన్ అయాకెజ్ కిజి నాను ఎలాగ బత్తిజి మహా ఇజి మీరు వెహి మనిదెర్. అయాలెకెండ దేవుణు సజమ్కాజ్ కనికారం సిల్లెండ నాను ఎసానొ హిమ్మెజ్ కిజి, వరిజ్ నాననం కిదెజ్ నుడఃత ఇజి మీరు వెహి మనిదెర్.

14 నా జతదు మని మహి యూదురిజ్ ఇంక యూద మతమ్ది రూలుజ్ విజు నాను తవ్వండ కిత. నా అనిసిర్ నెన్పిస్తి ఆసారమ్కు పటుదలదాన్ కిదెజ్ నండొ నుడఃత.

15-16 గాని నాను నా యూదు పొటాదు పిండెం ఆతి మహివలె, దేవుణు నజి వన్ని వందిజ్ ఎర్లిస్తాన్. వన్ని దయ దర్మమ్దాన్ వన్నిజ్ సేవ కిదెజ్ నజి ఏర్పాటు కిత్తాన్. నాను యూదురు ఆఇ వరి నడిఃమి యెసు వందిజ్ సువార్త వెహ్తి వందిజ్ వన్ని మరిసిజ్ నజి తోరిసి నెస్తిస్తైజ్ ఇజి వాండ్రు తిర్మామానం కిత్తాన్. ఆహె తిరర్మానం కిత్తివలె నాను ఎయె వెటబా ఆలోసనం వెన్బావెత.

17 నాను అపొస్తుడు ఆని ముజాల అపొస్తుడు ఆతి వరిజ్ నుడఃదెజ్ యెరూసలెమ్దుబ సాన్వెత. గాని వెటనె నాను అరెబియ ముటదు సాహ. వెనుక నాను దమస్కు పట్నమ్దు మర్జి వాత.

18 దేవుణు వన్ని మరిసిజ్ నజి తోరిసి, మూండ్రీ పంటెజ్ వెనుక, కేపా ఇజి కూకె ఆని పేతురు వెట నెల్వ ఆదెజ్ యెరూసలెమ్దు సాహ. అబ్బె వన్ని వెట రుండి వారమ్కు మహ.

19 మరి, ప్రబుజ్ ఎయెరిజ్బ నుడఃవెత. ప్రబుజ్ తంబెరి ఆతి యాకోబుజ్నె నుడఃత.

20 నాను రాసినికెజ్ నిజమ్నె. అబద్ధం ఆఉ. దిన్ని వందిజ్ దేవుణు నెసిన్నాన్.

21 పేతురు వెట యెరూసలెమ్దు మహి వెనుక నాను సిరియ, కిలికియ ఇని ముటజ సొహ.

22 నస్తవలె యూదయ ప్రాంతమ్దు మని దేవుణు సజమ్కాణికార్ నజి తోఎండ మహార్.

23 గాని మహికార్ నా వందిజ్ వెహ్ని మనికెజ్నె వెహ మనార్. “మజి ముజాలె హిమ్నెజ్ కిజి మహికాన్, ఉండ్రీ కాలమ్దు వాండ్రు నాసనం కిదెజ్ సుడఃతి మని సువార్త ఏలు వెహ్నినాన్”, ఇజి వెహ్ని మనికెజ్నె వెహ మనార్.

24 అందెజె నా వందిజ్ వారు దేవుణుదిజ్ పొగిడిఃతార్.

2

మహి అపొస్తురు వరి జతదు పవులుజ్ కుడుఃప్పినార్.

1 పతినాల్లి పంటిజ్ గడఃప్పి వెనుక, నాను యెరూసలెమ్దు మరి సొహ. బర్నబు నా వెట వాతాన్. తితుజ్బా మాపు వెట కూక్త ఒతాప్.

2 నాను సాండ్రెజ్ వలె ఇజి దేవుణు నజి తోరిసి వెహ్నిజ్నె నాను సొహ. అబ్బె పల్కుబడిః మని పెద్దలిజి కూడుప్తానె, యూదురు ఆఇ వరిజ్ నాను వెహ్నిని సువార్త ఇనిక ఇజి వరిజ్ వెహ్ని. ఎందన్నిజ్ ఇహిజి నాను వెహ్నినికెజ్ నిజం ఇజి వారు నెసిమండ్రెజ్. సిల్లిజి నాను ఏలు కిజిని సువార్త పణి, పణిదిజ్ రెవిండ ఆనాద్. యాలెకెండ వర్గిదెజ్ పల్కుబడిః మని పెద్దెల్జనె కుడుఃప్త. మరి ఎయెరిజ్బ కూడుఃవత.

3 నా వెట వాతి తీతు యూద వాండ్రు ఆఎన్. వాండ్రు గ్రీకు వాండ్రు. అందెజె వాండ్రు సునతి కిబె ఆఇకాన్. అహిజ్బా, వాండ్రు సునతి కిబె ఆదెజ్వలె ఇజి వారు కనితం వెహ్నితార్.

4 గాని నమ్మితికాప్ ఇజి వెహ్ని ఆని సెగొండార్ తీతు సునతి కిబె ఆదెజ్ వలె ఇజి వెహ్ని. వీరు గుట్టు నెస్తెజ్ ఇజి మా నడిఃమి డుగితార్, క్రీస్తుయేసు వెట కూడిఃతి మని దన్నిదటాన్ మజి వాతి విడుఃదలదిజ్ సుడఃతార్. మాటు యూదురి రూలుజ్ లొజిదెజ్ వలె ఇజి వెహ్నివతార్.

5 వారు వెహ్తాదన్నిజ్ సణెంబా లోజిఎతాప్. ఎందనిజ్ ఇహిజ నిజమాతి సువార్త మీ నడిమి నిల్పి మండ్రెజ్ ఇజి కోరితాప్.

6 గాని పల్కుబడిః మని పెద్దెల్జు, నాను వెహ్సిని సువార్త మారిస్తెజ్ ఇజినో, కండెక్బా దనివెట కుడుఃపైజ్ ఇజినో వెహ్ఎతార్. నజి వారు పలుకు బడిః మనికార్ ఆతిజ్బ ఆఇతిజ్బ నాను లెక్క కిఎత. దేవుణు ఇజ్రికార్ పెరికార్ ఇజి తెడః తొఎన్.

7 గాని యూదురిజ్ సుహర్త వెహ్తాజ్ దేవుణు పేతురుజ్ ఒపజెప్తి వజ, యూదురు ఆఇ వరిజ్ సువార్త వెహ్తాజ్ నజి ఒపజెప్త మనాన్ ఇజి వారు నెస్తార్.

8 ఇహిజ యూదురు నడిమి అపొస్తుడు ఆజి సేవ కిదెజ్ పేతురుజ్ సత్తు సితి దేవుణునె యూదురు ఆఇవరి నడిమి అపొస్తుడు ఆజి సేవ కిదెజ్ నజి సత్తు సితాన్.

9 నిటకోహి లెకెండ మని పెరి పెద్దెల్జు ఆతి యాకోబు, పేతురు, యోహాను ఇనికార్ దేవుణు నజి యా పెరి పణి ఒపజెప్త మనాన్ ఇజి నెస్తివలె బర్నబెజ్ నజి వరి వెట జత కూడఃజి పణి కినికార్ ఇజి ఉండ్రీ గుర్తు లెకెండ మా కికు వరి వెట కలస్తార్. మాపు యూదురు ఆఇ వరి నడిమి సువార్త వెహ్తాజ్ ఇజి వారు యూదురు నడిమి సువార్త వెహ్తాజ్ ఒప్పుకోటార్.

10 వరి నడిమి యెరూసలెమ్దు మని బీద వారు ఆతి నమ్మితి యూదురిజ్ మాపు సాయం కిదెజ్ ఇజినె వారు మా బాణిజ్ కోరితార్. నాను కిదెజ్ ఇజి నండో ఆస ఆతికాదె అయా సజితి.

పవులు పేతురుజ్ జటిజ్ ఆజినాన్.

11 కేపా ఇని పేతురు అంతియొకయ ఇని పల్నమ్దు వాతివలె, ఎద్రునె నాను వన్నిజ్ జటిజ్ ఆత. ఎందనిజ్ ఇహిజ వాండ్రు కిత్తి పణి తప్ప.

12 యాకోబు వెట కూడిఃతి మని సెగొండార్ నమ్మితి యూదురుజు అబ్బి వాని ముజాల వాండ్రు యూదురు ఆఇ నమ్మితి వరి వెట కూడఃజి బోజనం కిజి మహాన్. గాని వారు వాతిజ్, వీండ్రు యూదురు ఆఇ నమ్మితి వరివెట బోజనం కిఎండ వరి బాణిజ్ దూరం ఆతాన్.

వాండ్లు యీ లెకెండ్ కిత్తాన్. ఎందనిజ్ ఇహిజ మోసే సితి రూలుజ్ లోజిదెజ్వలె ఇజి డట్టం వెప్పిమహి యూదురి గుంపుదిజ్ తియెల్ ఆత్తాన్.

13 అంతియొకయదు మని మహి నమ్మితి యూదురు పేతురు వెట వాండ్లు ఆతి వేసమ్దు కూడితార్. వారు కిత్తిక సుడఃజి, బర్నబ మొసెం ఆతండ్రె, వారు కిత్తి లెకెండ్ వాండ్లుబా కిత్తాన్.

14 నిజమాతి సువార్తదు వెప్తి వజి వారు నడిఃఇక సుడఃతానె, అబ్బె మని నమ్మితి విజెరి ఎద్దు పేతురుజ్ జటిజ్ ఆత. నాను ఈహు వన్నిజ్ వెప్తా, “ఓ పేతురు, నీను యూద వాండ్లు ఆజిబా, వరి లెకెండ్ బత్తిఇ. యూదురు ఆఇవరి లెకెండ్ బత్తిజిని. మరి యూదురు ఆఇకార్ యూదురు లెకెండ్ మండ్రెజ్ వలె ఇజి ఎలాగ నీను డటం వెప్తాజ్ అట్సినీ”.

15 నాను మరి వరి విజెరిజ్ వెప్పిన. మాటు యూదురు జాతిదు పుట్టికాట్. దేవుణు రూలుజ్ నెన్ఇకాట్ ఆవెట్.

16 గాని దేవుణు మోసెజ్ సితి రూలుజ్ లోజిజి ఒరెన్ దేవుణు ఎద్దు నీతి నిజాయితి మనికాన్ ఆవెన్. గాని యేసుక్రీస్తు ముస్కు నమకం ఇట్టిజనె నీతి నిజాయితి మనికాన్ ఆనాన్ ఇజి నెస్త్ మనాట్. అందెజె యూదురు ఆఇకార్నె ఆవెండ, మాటుబా క్రీస్తు యేసుజ్ నమ్మితాట్. రూలుజ్ లోజిజి దేవుణు ఎద్దు నీతి నిజాయితి మనికాట్ ఆవెండ, క్రీస్తుజ్ నమ్మిజినె దేవుణు ఎద్దు నీతి నిజాయితి మనికాట్ ఆని వందిజె మాటు క్రీస్తు యేసుజ్ నమ్మితాట్. ఎందనిజ్ ఇహిజ, రూలుజ్ లోజిజి ఎయెన్బా దేవుణు ఎద్దు నీతి నిజాయితి మనికాన్ ఆవెన్ఇ జి మాటు నెసినాట్.

17 క్రీస్తు యేసు వెట కూడిఃతి మని దనితాన్ మాటు దేవుణు ఎద్దు నీతి నిజాయితి మనికాట్ ఆదెజ్ కోరినాట్. గాని మాటు యీ లెకెండ్ ఆదెజ్ సూణివలె, యూదురు ఆఇవరి లెకెండ్ పాపమ్దు మనాట్. అయావలె క్రీస్తునా మజి తపు కిబిసినికాన్? ఆవెన్.

18 రూలుజ్ లోజిజి ఒరెన్ దేవుణు ఎద్దు నీతి నిజాయితి మనికాన్ ఆవెన్ ఇజి నాను ముజలె తొరిస్త్. నాను నెక్తిపొక్తి దన్ని దరోట్ మరి

మహ్తాజ రూలుజ్ తప్పి వన్ని లెకెండ నాను మన్న ఇజి రుజుప్ కిజిన.

19 యూదురి రూలుజ్ లోజిజి మహివలె, అయాకెజ్ కిజి, దేవుణు ఎద్రు నీతి నిజాయితి మనికాన్ ఆదెజ్ అట్ఎన్ ఇజి నాను నెస్త. అందెజె దేవుణు వందిజ్ బత్కిదెజ్ యూదురి రూలుజ్ బాణిజ్ డిబె ఆత.

20 నాను క్రీస్తు వెట సిలువాదు కుటిజాణిజ్ డెయె ఆతి లెకెండ మన. నాను బత్కిజి మహి లెకెండ మరి బత్కిఎ. క్రీస్తునె నా మన్నుదు బత్కిజినాన్. ఏలు నాను ఆఎ నా ముస్కు అతికారం కిజినాన్. గాని క్రీస్తు నా లోఇ మంజి నా ముస్కు అతికారం కిజినాన్. నాను యా లోకమ్దు బత్కిజిని బత్కు దేవుణు మరిసిజ్ నమ్మిజి బత్కిజిన. వాండ్రు నజి ప్రేమిసి నా వందిజ్ వన్ని పాణం సితాన్.

21 దేవుణు దయ దర్థం నాను నెక్కి పొక్ఎ. యూదురి రూలుజ్ లోజిజి ఒరెన్ నీతి నిజాయితి మనికాన్ ఆనాన్ ఇహిజి క్రీస్తు సాతి సాపు అనవసరమ్నె.

3

యూదురి రూలుజ్నా క్రీస్తు ముస్కు మని నమకమ్నా నిజమాతిక?

1 గలాతియ ముటాదు మని దేవుణుదిజ్ నమ్మితికిదెరా, ఎండనిజ్ మీరు బుద్ధి సిలివరి లెకెండ మనిదెర్? ఎయెర్ మిజి మొసెం కిత్తార్? యేసు క్రీస్తు మీ వందిజ్ సిలువాదు సాతిదని వందిజ్ నాను మీ కణకెజ్ నిండ్రు తోరిసి వెప్తా మన గదె?

2 “యూదురి రూలుజ్ లోజిజినిజ్ దేవుణు ఆత్మ మిజి దోహ్క మనాదా? మాపు మిజి వెప్తా సువార్త వెంజి నమ్మిత్తిజ్ గదె మిజి దోహ్క మనాద?” యా ఉండ్రె సజతినె వెప్తు.

3 మీరు నిసా బుద్ధి సిలికిదెరా? మీరు మీ కొత్త బత్కు మొదోల్స్తివలె దేవుణు ఆత్మ సత్తుదాన్ మొదోల్స్తిదెర్. మరి ఏలు మీ సొంత సత్తుదాన్ మీ బత్కు పూర్తి కిదెజ్ సుడేజినిదెరా?

4 మీరు దేవుణుడినీ నమ్మితి వెనుక, నండో ఒరిస్తిదెర్. మీరు ఒరిస్తికెజ్ పణిదిజ్ రెఇకెజ్ ఆతెనా? మిజి జరిగితికెజ్ పణిదిజ్ రెఎండ ఆఉతె ఇజి నాను ఆన ఆజిన.

5 అందెజె దేవుణు ఆత్మ మిజి నండో సీజి గొప్ప సత్తు మని పెరి పణిజ్ మీ నడిమి కిజినిక, మీరు మోసె సితీ రూలుజ్ లోజిజినిజ్నా? ఆవద్. గాని మీరు సువార్త వెంజి నమ్మిజినిజ్నె వాండ్రు మిజి వన్ని ఆత్మ సీజినాన్.

6 అబ్రాహము వందిజ్ దేవుణు మాటదు రాస్తి మనిక నెస్తు, “వాండ్రు దేవుణుడిజ్ నమ్మితాన్. అందెజె దేవుణు వన్నిజ్ నీతి నిజాయితి మనికాన్ ఇజి ఒప్పుకొటాన్”, ఇజి రాస్త మనాద్.

7 అందెజె దేవుణు ముస్కు నమకం ఇట్టికారె, నిజమాతి అబ్రాహము కొడోర్ ఇజి నెస్తు.

8 సేన దినమ్కాజ్ ముజాలె దేవుణు మాటదు రాస్తమనాద్, యూదురు ఆఇకార్ దేవుణు ముస్కు నమకం ఇట్టిజ, వాండ్రు వరిజ్ నీతి నిజాయితి మనికార్ ఇజి డగ్గు కినాన్. వాండ్రు అబ్రాహముజ్, “లోకమ్ది లోకుర్ విజెరెజ్ నీ వెట నాను దీవిన్న”, ఇజి అయాక జర్గిఇ ముజాలె సువార్త వెహ్నాన్.

9 అందెజె దేవుణు ముస్కు నమకం ఇట్టి విజెరిజ్ అబ్రాహము వెట కూడుప్పి దీవిసినాన్.

10 దేవుణు మోసెజ్ సితీ రూలుజ్ లోజిజి వన్ని ఎద్రు నీతి నిజాయితి మనికార్ ఆదెజ్ సుడెజిని విజెరె, దేవుణు సితీ సాయిపు అడిగి మంజినార్. ఎండనిజ్ ఇహిజ, దేవుణు మాటదు రాస్త మనాద్, “మోసె రాస్తి పుస్తకమ్కాజ్ మని రూలుజ్ విజు ఎస్తివలెబా కిఇ ఎయెన్బా దేవుణు సితీ సాయిపు అడిగి మంజినాన్”,

11 గాని నిజమె, ఒరెన్ విజు రూలుజ్ లోజితిజ్బా దేవుణు ఎద్రు నీతి నిజాయితి మనికాన్ ఆవన్. ఎండనిజ్ ఇహిజ, “ఎయెజ్ నీతి నిజాయితి మనికాన్ ఇజి నాను ఇట్టమననో వాండ్రు నా ముస్కు నమ్మకం ఇట్టి వందిజ్ ఎలా కాలం బత్రినాన్”, ఇజి దేవుణు వెహ్మనాన్ ఇజి దేవుణు మాటదు మనాద్.

12 గాని దేవుణు సీతి రూలుజు లొణ అయాలెకెండె ఆవద్. ఎండనిజ్ ఇహిజు నమ్మకం మండ్రెజ్ వలె ఇజి రూలుజ్ వెహ్. దేవుణు మాటదు వెహ్క ఇనిక ఇహిజు, 'రూలుజ్ నడిఃపిసిని వజు బత్తిదెజ్ కోరిజినికాన్ అయాలెజ్ ఎస్తివలెబ లోజీదెజ్ వలె',

13 మోసే సీతి విజు రూలుజ్ లోజీఇ వరి మున్కు వాజిని సయిపుదాన్ క్రిస్తు మజి డిఃపిస్తాన్. ఎండనిజ్ ఇహిజు దేవుణు మాటదు రాస్త మనాద్, "కొహిదు డెల్పె ఆజి సాని ఎయెన్బా దేవుణు సాయిపు మనికాండ్రె".

14 క్రిస్తు యా లెకెండె ఆతండ్రె మజి డిఃపిస్తాన్. ఎండనిజ్ ఇహిజు, దేవుణు అబ్రహముజ్ ఒట్టు కిత్తి దీవెనమ్కు యూదురు ఆఇ వరిజ్ క్రిస్తు యేను వెట దోహ్కె. మరి క్రిస్తు మున్కు మజి మని నమ్మకమ్దాన్, దేవుణు సీన ఇజి ఒట్టు కిత్తి వన్ని ఆత్మ మజి దోహ్కె వందిజ్ క్రిస్తు యా లెకెండె సాయిపు మొపె ఆతండ్రె మజి సాయిపుదాన్ డిఃపిస్తాన్.

15 తంబెరిజాండె, మాటు రోజు బత్తిజిని బత్తుదాన్ ఉండ్రె మాట లాగ్గి వెహ్. రిఎర్ ఉండ్రె సజతి వందిజ్ ఉండ్రె ఆజి ఉండ్రె ఒపుమానం కిత్తి మహిజు, ఎయెన్బా అయాక తప్పెజ్నో, దనివెట ఇనికబా కుడుఃపైజ్నో అక్కు సిల్లెద్. అయాలెకెండె, దేవుణు మా వెట కిత్తి యా ఒపుమానమ్బా నిల్చి మంజినాద్.

16 దేవుణు అబ్రహము వెట, మరి వన్ని తెగ్గదు పుట్టి వన్నివెట ఒట్టుజ్ కిత్తాన్. 'తెగ్గదు పుట్టి వరిజ్ ఇహిజు నండె లోకురిజ్', ఇజి దేవుణు మాటదు వెహ్. గాని 'నీ తెగ్గదు పుట్టి వన్నిజ్' ఇజి వెహ్సినాద్. ఇహిజు అయాక ఒరెన్ వనిజ్నె. వాండ్రె క్రిస్తు.

17 నాను వెహ్సి వాజనిక ఇనిక ఇహిజు, దేవుణు ముజాలె అబ్రహము వెట ఒట్టు కితాండ్రె అయాక కిదెజ్ ఇజి తీర్మానం కిత ఇట్టాన్. అందెజె నాల్గి వందెజ్ ముపాయ్ (430) పంటెజ్ వెనుక దేవుణు మోసెజ్ సీతి రూలుజ్ అబ్రహము వెట కిత్తి ఒపుమానమ్దిజ్ తప్పిసి నస్తివలె కిత్తి తిరుమానమ్దిజ్ సిల్లెండ కిదెజ్ అట్.ఉ.

18 దేవుణు సీన ఇజి ఒట్టు కిత్తి అక్కు, మాటు రూలుజు లోజీతిజునె

దొహ్కాద్. ఇహిజ వాండ్రు కిత్తి ఒట్టుదాన్ మజి అయా అక్కు దొహ్కాద్. గాని దేవుణు అబ్రాహముజ్ సిన ఇజి ఒట్టు కిత్తిజ్ వాండ్రు వన్ని దయా దర్మదాన్ సితాన్.

19 అందెజె మరి ఎందనిజ్ దేవుణు మోసె వెట రూలుజ్ సితాన్? ఎందనిజ్ ఇహిజ తవుజ్ ఇని ఇనికెజ్ ఇజి తోరిస్తెజె రూలుజ్ సితాన్. యా రూలుజ్ అబ్రాహము తెగ్గదు పుట్టికాన్ వానిదాక లోకురిజ్ నడిఃపిస్తెజె సితాన్. ఒట్టుదు ఎయె వందిజ్ వెహ్తా మనానో వాండ్రె వీండ్రు. దేవుణు వన్ని దూతెజ్ వెట మోసెజ్ రూలుజ్ సితాన్. మోసె అయాక లోకురిజ్ సితాన్. మోసెనె, దేవుణు లోకుర్ నడిఃమి ఒపిసిని వన్ని లెకెండ్ నిహ మనాన్.

20 రిఎర్ నడిఃమి నిల్పికాండ్రె ఒరెన్ ఒపిస్నికాన్. గాని ఒపిస్నికాన్ సిల్లెండనె దేవుణు అబ్రాహముజ్ ఒట్టు కిత్తాన్. ఎందనిజ్ ఇహిజ ఒరెండ్రె ఒట్టు కిత్తాన్ వాండ్రె దేవుణు.

21 అహిజ, దేవుణు అబ్రాహముజ్ ఒట్టు కిత్తి వెనుక, మోసెజ్ రూలుజ్ సీతివలె వాండ్రు కిత్తి ఒట్టుదిజ్ వెత్తెకమ్దికెజ్న రూలుజ్? సిల్లె ఆహె ఆవద్. రూలుజ్ లోకురిజ్ ఎల్లకాలం బత్కిదెజ్ బత్కిని బత్కు సీదెజ్ అట్టి ఇహిజ, యా రూలుజ్ లోజిజి దేవుణు ఎద్రు నీతి నిజాయితి మనికార్ ఆతార్ మరి.

22 గాని దేవుణు మాట వెహ్సినాద్, యా లోకమ్దు మని లోకుర్ విజెరె తోహె ఆతి వరిలెకెండ్ పాపం అడిఃగి మనార్ ఇజి. అందెజె దేవుణు ఒట్టు కిత్తికెజ్ దొహ్కెజ్ ఇహిజ యేసుక్రీస్తు ముస్కు నమ్మకం ఇడదెజ్. నమ్మకం ఇట్టిజనె దొహ్కె.

23 క్రీస్తు రెఎండ మహి ముజాల, యా నమకం రెఎండ మహాద్. నస్తివలె మోసె సీతి రూలుజ్, ఒరెన్ జమాను కాప్ కిని లెకెండ్, యూదురు ఆతి మజి తొహ్సి ఇడఃజి కాప్ కిజి మహె. ఇహిజ యా రూలుజ్నె మా ముస్కు అతికారం కిజి మహె. యాక, లోకుర్ క్రీస్తుజ్ నమ్మిదెజ్ ఆనాద్ ఇజి దేవుణు తోరిసిని కాలమ్దాన్నె మహాద్.

24 అందెజె క్రీస్తు రెఎండ మహివలె, యా యూదురి రూలుజ్నె, మజి సుడఃజి నడిఃపిసితె. ఎందనిజ్ ఇహిజ, క్రీస్తు వాతి వెనుక వన్నిజ్

నమ్మిజి దేవుణు ఎదు నీతి నీజాయితి ఆదెజ్ ఇజి వెహ్తాన్.

25 గాని ఏలు క్రీస్తుజ్ నమ్మిదెజ్ అట్టాట్. అందెజె రూలుజ్ మా మున్ను అతికారం కిదెజె అట్ఉ.

దేవుణు కొడొఱ్

26 క్రీస్తు యేసు మున్ను నమకం ఇట్టిదెర్. అందెజె మీరు విజిదెరె దేవుణు కొడొఱ్.

27 మీ లొఇ మని బాప్తీసం లాగె అతికార విజెరె క్రీస్తు వెట కూడితి మనిదెర్. అందెజె క్రీస్తు గుణమ్కు మిజిబా మంజినె.

28 అందెజె యూదురు ఇజినొ, యూదురు ఆఇకార ఇజినొ, వెట్టిపణి కినికార్ ఇజినొ, కిఇకార్ ఇజినొ, మొకకొడొఱ్ ఇజినొ, అయ్లికొడొఱ్ ఇజినొ అవద్ ముకెలం మీరు విజెదెరె ఉండ్రె లొకుర్. ఎందనిజ్ ఇహిజు, మీరు క్రీస్తు యేసు వెట కూడితి మనిదెర్.

29 మీరు క్రీస్తు వెట కూడితి మనికిదెర్ ఇహిజు, అబ్రాహము తెగ్గదు పుట్టికిదెర్. ఎందనిజ్ ఇహిజు క్రీస్తు అబ్రాహము తెగ్గదు పుట్టికాన్. మీరు దేవుణు అబ్రాహము వెట ఒట్టు కిత్తి దన్నిజ్ అక్కు మనికిదెర్.

4

1 నాను వెప్పొనిక ఇనిక ఇహిజు, ఒరెన్ వన్ని ఆస్తిదిజ్ అక్కు మనికాన్ వన్ని కొడొఱె. గాని అయా కొడొఱె ఇజ్రికాన్ మనివలె, వాండ్రు ఒరెన్ వెట్టిపణి కినివన్ని లెకెండ ఇనిదని మున్నుబా అతికారం సిల్లెండ మనాన్. అయా కొడొఱె అప్పొసి ఆస్తిదిజ్ అక్కు మనికాన్ ఆతిజ్బా ఇనిదని మున్ను అతికారం సిల్లెండ మనాన్.

2 వన్ని అప్పొసి ఎత్తుకిత్తి వయుసు వానిదాక, వాండ్రు వన్నిజ్ కోప కినివరి అడిగి, వన్ని ఆస్తి సూణి పణి మణిసిర్ అడిగి మంజినాన్.

3 అయాలెకెండె మాటుబా క్రీస్తు యా లొకమ్దు వాని ముజాల, మాటుబా యా లొకమ్ది అలవాటుజు అడిగి మహట్.

4 గాని దేవుణు ఎత్తుకిత్తి తగితి నమయం వాతివలె వాండ్రు వన్ని మరిసిజ్ పొక్తాన్. వాండ్రు ఉండ్రె బోదెలి పొటా లొఇహాన్ పుట్టాన్. వాండ్రు యూదురి రూలుజ్ విజు లొజిజి బత్తితాన్.

5 యూదురి రూలుజ్ లోజీజి దని అడిగి మహి మజీ, దని బాణిజ్ డి: డి:పిన్ని వందిజ్, దేవుణు వన్ని మరిసిజ్ పొక్తాన్. ఎందనిజ్ ఇహిజ మాటు పూర్తి అక్కు మని దేవుణు కొడోర్ ఆదెజ్ ఇజి,

6 మీరుని మాపు వన్ని కొడోర్. అందెజె దేవుణు వన్ని మరిసి ఆత్మదిజ్ మా మన్నుదు మండ్రెజ్ ఇజి పొక్తాన్. యా ఆత్మనె మా లోఇహాన్ 'ఓబా', ఇజి కూక్కి మజీ పార్దనం కిబిసినాన్.

7 అందెజె ఏలుదాన్ మీరు ఒరెన్ ఒరెన్ వెటి పణికిని వన్నిలెకెండ్ అఇదెర్. గాని మీరు ఒరెన్ ఒరెన్ దేవుణు కొడో: ఆతి మనిదెర్. అందెజె మీరు వన్ని మరిసిరిర్ సీన ఇజి వాండ్రు ఒట్టు కిత్తి దన్నిజ్ విజు అక్కు మనికిదెర్.

8 ఉండ్రీ కాలమ్దు దేవుణుదిజ్ నెన్ఇ ముజుల నిజం ఆఇ దేవుణుక అడిగి మహిదెర్.

9 గాని ఏలు మీరు దేవుణుదిజ్ నెస్తి మనిదెర్. మరి ఒదె వాండ్రు మిజీ నెస్త మనాన్. మరి ఎందనిజ్ మీరు సత్తు సిలి పణిదిజ్ రెఇ దెయమ్క దరోట్ మర్జినిదెర్. మరిబ దన్ని అడిగి మండ్రెజ్ కోరిజినిదెరా?

10 మీరు నెగ్గి దినమ్కు ఇజి నెగ్గి నెలెజ్ ఇజి సర్ద ఆని కాలమ్కు ఇజి నెగ్గి ఏంటుజ్ ఇజి సూణిదెర్.

11 మీరు కిజిని వన్కాజ్ నాను నెసి, మీ వందిజ్ బాద ఆజిన. నాను మీ నడిమి కస్టబడి:జి కిత్తి సేవ పణి, పణిదిజ్ రెఎండ ఆనాద్ ఇజి బాద ఆజిన.

12 అందెజె తంబెరిజాండె, నాను మిజీ బతిమాల్జిన. మీరు నజీ పోలిజి మండ్రు. ఎందనిజ్ ఇహిజ మోసె సితి రూలుజి బాణిజ్ డి:బె ఆతి యూదురు ఆఇ మీలెకెండ్ ఆతమన నాను. మీరు ఎస్తివలెబా నజీ నెగ్గెండ సుడ్:తి మనిదెర్.

13 నాను మిజీ సువార్త తొలిత వెష్టావలె నాను ఎలాగ మహా ఇజి మీరు నెస్సిదెర్. నాను నెగెండ్ సిల్లెండ కస్టం ఆర్తమహా.

14 నాను కస్టం అర్తివలె మీరు నండొ బాద ఆతిదెర్. గాని మీరు నజీ ఇజ్రి కణకదాన్ తొఇదెర్. నజీ నెక్కి పొక్ఇతిదెర్. అహిజ దేవుణు పొక్తి

ఒరెన్ దూత లెకెండ్ మీరు నజీ డగ్రు కిత్తిదెర్. క్రీస్తుయేనుజ్ డగ్రు కిని లెకెండ్ నజీ డగ్రు కిత్తిదెర్.

15 అయావలె మీరు గొప్ప సర్దదాన్ మహిదెర్. ఏలు మీ సర్దద విజు ఇనిక ఆతాద్? మీరు నా వందిజ్ ఇనికబా కిదెజ్ తయార్దాన్ మహిదెర్. మీ సొంత కణుకుబా లాగ్గి సిదెజ్ ఇజి నాను లొస్సిక ఇహిజు, అయాకబా కిదెజ్ మీరు తయార్దాన్ మహిదెర్ ఇజి నాను మీ వందిజ్ నిజం వెహ్నిన.

16 ఏలు నాను మిజీ నిజం వెహ్నినిజ్ మిజీ పడఃఇకాన్ ఆతానా?

17 యూదురి రూలుజ్ లొజీదెజ్ వలె ఇజి వెహ్నిని వరి వెట మీరు కూడఃదెజ్ ఇజి పటుదలదాన్ నండొ ఆస ఆజినార్. గాని వరి ఉదేసమ్కు నెగ్గికెజ్ ఆఉ. మిజీ మా బాణిజ్ దూరం కిబెస్తెజె వారు సుడఃజినార్. ఎందనిజ్ ఇహిజు మీరు వరివెట కూడఃజి, వారు మీ వందిజ్ పటుదలదాన్ ఆస ఆజిని లెకెండ్, మీరు వరి వందిజ్ ఆస ఆజి మండ్రెజ్.

18 ఉదెసం నెగ్గిక ఇహిజు పటుదలదాన్ మంజినిక నెగెదె. ఎస్తివలెబా పటుదలదాన్ ఆహె మండ్రెజ్. నాను మీ వెట మని వలెనె ఆవండ, సిలివలెబా పటుదలదాన్ మండ్రెజ్.

19 నాను ప్రేమిస్సి లోకురండె, నాను మీ వందిజ్ మరిబా బాద ఆజిన. ఏరు ఈబదెజ్ నొప్పిదాన్ బాద ఆని ఉండ్రీ బోదెల్లెకెండ్ నాను మరిబా మీ వందిజ్ బాద ఆజిన. క్రీస్తు నని గుణమ్కు మిజీ వానిదాక నాను బాద ఆజినె మంజిన.

20 ఏలు మీ నడిఃమి మంజి, మిజీ నిపాతి వెహ్నెజ్ ఇజి నాను నండొ ఆస ఆజిన. ఎందనిజ్ ఇహిజు మీరు ఎందనిజ్ యా లెకెండ్ కిత్తిదెర్ ఇజి నాను గాబ్ర ఆజిన.

ఆగారుని సార

21 మోసె రాస్తి రూలుజ్ లొజీదెజ్ వలె ఇజి వెహ్నిని వరిజ్ నాను వెనబాజిన. మోసె రాస్తి పుస్తకమ్కాజ్ ఇనిక రాస్త మనాద్ ఇజి మీరు నెస్సిదెరా?

22 ఇనిక రాస్త మనాద్ ఇహిజ, అబ్రాహముజ్ రిఎర్ మరిసిర్ మహార్. ఒరెన్ వన్నిజ్ వెటి పణిమణిసి కాస్తాద్. మరి ఒరెన్ వన్నిజ్ వెట్టిపణి మణిసి ఆఇకాద్ కాస్తాద్.

23 వెట్టిపణి మణిసి వెట పుట్టికాన్ ఒడొల్ ఆసదాన్ పుట్టాన్. గాని వెట్టిపణి మణిసి ఆఇ దని వెట పుట్టికాన్, దేవుణు ఎత్తు కిజి అబ్రాహము వెట కిత్తి ఒట్టు వజ పుట్టాన్.

24 యా రుండి బోదెకాజ్ రుండి సజతిజ వెట పోలిసి వెహ్లాజ్ ఆనాద్. యా రుండి బోదెకు దేవుణు లోకుర్ వెట కిత్తి రుండి ఒపుమానమ్కు లెకెండ్ మన్నె. సీనాయి గొరొతు దేవుణు ఇస్త్రాయేలు లోకురిజ్ రూలుజ్ సితవలె, వరి వెట కిత్తి ఒపుమానం ఆగారుజ్ పోలిత మనాద్. ఆగారు వెట్టిపణి కొడొరిజ్ ఇట్టి లెకెండ్, యా ఒపుమానం లోకురిజ్ వెట్టిపణి మణిసిర్ లెకెండ్ కినాద్.

25 ఏలు అరెబియాదు మని సీనాయి గొరొతు సిత ఒపుమానం ఆగారుజ్ పోలిత మనాద్. వెట్టిపణి మణిసి ఆతి ఆగారు ని దని కొడొరి లెకెండ్ మనార్. ఏలు యెరూసలెమ్మని బాన్ మని లోకుర్ ఎందనిజ్ ఇహిజ వారు అయా ఒపుమానమ్దు వెస్సాని రూలుజ అడిగి మనార్.

26 గాని ముస్కు మని యెరూసలెం వెట్టిపణి మణిసి ఆఇకాద్ ఆతి సారెజ్ పోలిత మనాద్. నమ్మితి మజి విజెరిజ్ అయ్సినె సార.

27 ఎందనిజ్ ఇహిజ దేవుణు మాటదు వెస్సానాద్, “కొడొరి కాన్ఇ గొడ్డు బోదెలి సర్ద ఆఅ. ఏరు ఈబని వలె మని నొప్పి నెస్ఇకి, నీను గొప్ప సర్ద ఆజి డటం డెడిస్అ. ఎందనిజ్ ఇహిజ, మాసి మని బోదెల్దిజ్ ఇక మాసి డిస్తి బోదెల్దిజ్ నంణెండార్ కొడొరి మనార్”.

28 ఏలు తంబెరిజాండె, మీరు ఇస్సాకు లెకెండ్ మనిదెర్. ఎందనిజ్ ఇహిజ, దేవుణు అబ్రాహముజ్ సీన ఇజి కిత్తి ఒట్టు వజ మీరు పుట్టిదెర్.

29 నస్తవలె ఒడొల్ ఆసదాన్ పుట్టికాన్ దేవుణు ఆత్మదాన్ పుట్టి వన్నిజ్ మాలెజ్ కిత్తాన్. అయాలెకెండ్ ఏలుబా జర్గిజినాద్.

30 గాని దేవుణు మాట ఇనిక దిన్ని వందిజ్ వెస్సానాద్, ‘వెట్టిపణి బోదెల్దిజ్ దని కొడొరి వెట నెక్కి పొక్తు. ఎందనిజ్ ఇహిజ, వెట్టిపణి

మణిసి పొటది కొడొడిదీజ్, వెట్టిపణి మణిసి ఆఇ దని పొటది కొడొడి వెట అప్పొసి ఆస్తిదిజ్ అక్కు మండ్రెజ్ వీలు సిల్లెద్”,

31 అందెజె తంబెరిజాండె, మాటు వెట్టిపణి బోదెలి కొడొడిర్ ఆఎట్. గాని మాటు వెట్టిపణి మణిసి ఆఇ దని కొడొడిర్ నె.

5

1 క్రీస్తు మోసె సీతి రూలుజ అడిఃగిదాన్ డిఃబిస్తివలె, దని అడిఃగి మన్ఎండ మంజిని వందిజె డిఃబిస్తిన్. అందెజె డిఃబె ఆతి వరిలెకెండ్ నెగ్రెండ నిల్పి మండ్రు. మీరు వెట్టిపణి మణిసి లెకెండ్ రూలుజ అడిఃగి మన్మాట్.

2 నా మాటెజ్ జాగర్త విండ్రు. పవులు ఇని నాను మిజి వెప్పిన. దేవుణు ఎద్రు నీతి నిజాయితి మనికిదెర్ ఆదెజ్ మీరు సునతి కిబె ఆదెజ్ సుడఃతిజ, క్రీస్తు మీ వందిజ్ ఆతిదని వందిజ్ ఇని విలువ సిల్లెద్.

3 సునతి కిబె ఆని విజెరెజ్ నాను మరిబా వెప్పిన. మోసె సీతి రూలుజ్ విజు మీరు పూర్తి లోజిదెజ్ వలె.

4 మోసె సీతి రూలుజ్ లోజిజి, దేవుణు ఎద్రు నీతి నిజాయితి మనికాన్ ఆదెజ్ సూణికాన్, క్రీస్తు బాణిజ్ పూర్తి దూరం ఆతాన్. దేవుణు దయా దర్మమదిజ్ నెక్తి పొక్తిదెర్.

5 గాని దేవుణు మజి నీతి నిజాయితి మనికార్ ఇజి వన్ని ఎద్రు ఇడ్నాన్ ఇజి మాటు ఆస ఆజినాట్. మాటు ఎండనిజ్ యా లెకెండ్ ఆసదాన్ ఎద్రు సుడఃజినాట్ ఇహిజ, దేవుణు మజి నీతి నిజాయితి మనికార్ ఇజి ఇడ్నాన్ దేవుణు ఆత్మనె మజి దయరం సీజినాన్. ఎండనిజ్ ఇహిజ మాటు క్రీస్తు యేసు ముస్కు నమకం ఇడఃజినాట్.

6 ఎండనిజ్ ఇహిజ, క్రీస్తు యేసు వెట కూడిఃతి మనాట్ ఇజి మాటు నెస్నాట్. ఒరెన్ సునతి కిబె ఆత మనాండ్రొ, సిలెనొ ఇజి దేవుణు తోఎన్. గాని దేవుణు సూణిక, ఒరెన్ క్రీస్తు ముస్కు నమకం ఇట్టా మనాండ్రొ ఇజినె. మహి వరిజ్ ప్రేమిసినె క్రీస్తు ముస్కు నమకం ఇట్టా మనాన్ ఇజి తోరిస్సెజ్.

7 మీరు నెగ్రెండనె నమ్మిజి మహిదెర్. మరి, ఎయెన్ మిజి మొసెం కిజి, నిజమాతి సువార్త లోజిఎండ అడు కిత్తాన్?

8 వన్ని లోకుర్ ఆదెజ్ మిజి కూక్తి దేవుణు యా లెకెండ్ మిజి వెహ్ఎన్.

9 పులాని దూరు కండెక్ ఆతిజ్బా, కుండార్ మని దూరు విజు పులాజ్ కినాద్. అయాలెకెండ్ ఉండ్రీ తపు బొదబ కినాద్.

10 మాటు ప్రబు వెల కూడిత మనాట్. అందెజె మహి బొదెజు మిరు లోజిఇదెర్ ఇజి నాను అనుమానం సిల్లెండ నమ్మిజిన. మిజి పంబ్ర కిబిస్సికాన్, వాండ్రు ఎయెన్ ఆతిజ్బా దేవుణు వన్నిజ్ తగితి సిక్కు సీనాన్.

11 తంబెరిజాండె, సెగొండార్ వెహ్సినార్ దేవుణు కొణ్డొరస ఆదెజ్ ఇహిజు సునతి కిబె ఆదెజ్వలె ఇజి. నాను అయాలెకెండ్ వెహ్సి మంజినిక ఇహిజు, యూదురు నజి మాలెజ్ కిఎత్తార్మరి. సునతి కిబె ఆదెజ్వలె ఇజి నాను వెహ్సి మంజినిక ఇహిజు, సిలువాదు క్రిస్తు సాతిసావు వందిజ్ నాను వెహ్సి వలె వారు నా ముస్కు కొపం ఆవెత్తార్మరి.

12 సునతి కిబె ఆదెజ్వలె ఇజి వెహ్సి మజి పంబ్ర కిబిస్సి యా లోకుర్, కొణ్డొర్ ఇడెడెజ్ అట్ఇ వరి లెకెండ్ ఆపిర్ ఇజి నాను ఆస ఆజిన.

13 తంబెరిజాండె, డిబె ఆతి వరి లెకెండ్ దేవుణు మిజి కూక్ మనాన్. మీరు ఇన్ఘం ఆతి సెఇకెజ్ కిదెజ్ ఆనాద్ ఇజి ఒడెబిమాట్. గాని మరి ఒరెన్ వన్నిజ్ ప్రేమిసి సేవ కిదెజ్ మిజి అక్కు మనాద్.

14 మోసె సితి రూలుజ్ విజు ఉండ్రె మాటాద్ కూడితె మన్నె. అయాక ఇనిక ఇహిజు, “నీను నిజి ప్రేమిస్సి లెకెండ్, మహి వరిజ్ ప్రేమిస్అ”, ఇజి.

15 గాని మీరు జంతుజు లెకెండ్ కటె ఆజి, ముకెజ్ లాగ్గి మహిజు, మీరు ఒరెన్ మరి ఒరెన్ వన్ని బాణిజ్ పూర్తి నాసనం ఆనిదెర్ ఇజి జాగర్త సుడెఃఅదు.

దేవుణు ఆత్మ నడిపిసిని బత్తు.

16 అందెజె నాను మిజి వెప్పిన, దేవుణు ఆత్మ మీ మన్నుదిజ్ వెప్పి నడిః పిసిని వజ నడిఃదు. అయావలె మీ ఒడొఃల్ది సెఇ ఆసెజ్ కిబిస్సి సెఇ పణిజ్ మీరు కిఎండ మంజినిదెర్.

17 మా ఒడొఃల్ది సెఇ ఆసెజు పడిఃఎద్ దేవుణు ఆత్మ. దేవుణు ఆత్మదిజ్ పడిఃఎద్ సెఇ ఆసెజ్. యా రుండి సెఇ ఆసెజ్ని దేవుణు ఆత్మ కూడఃజి మన్ఉ. అందెజె మీరు ఎస్తివలెబా కిదెజ్ కోరిజినిక కిఎండ మండ్రెజ్ అట్టిదెర్.

18 గాని దేవుణు ఆత్మనె మిజి నడిఃపిసి మహిజు, మీరు మోసె సితీ రూలుజ్ లొజిజి దని అడిఃగి మన్ఇదెర్.

19-21 ఒడొఃల్ది సెఇ ఆసెజ్ కిబిస్సి పణిజ్ విజెరె నెస్సికెజె. అయాకెజ్ ఇని ఇనికెజ్ ఇహిజు, రంకు బూలానిక, కెలార్బూలానిక, సాని బూలానిక, బొమెజు మాడిఃస్సిక, సెట్నిక, పగ ఆనిక, గొడబ ఆనిక, ఆఇవరి వన్కా వందిజ్ నండొ ఆస ఆనిక, సొంత ఇస్త్వమ్కునె సూణిక, కేటెజ్ ఆనిక, మిజి పడఃఃఇ వరి బాణిజ్ దూరం ఆనిక, మిజి కూడ్చి వరివెట కూడ్చిక, గోస ఆనిక, సొస్సిక, ఉణిజి తింజి సొసి కర్జిజి సెఇ పణిజ్ కిజినిక. నాను ముజాలె మిజి డటం వెప్తి లెకెండ మరి వెప్పిన. నిని పణిజ్ కిజి బత్కినికార్ దేవుణు ఏలుబడిః కిని లొకుర్ లొఇ మండ్రెజ్ అట్ఎర్.

22-23 గాని దేవుణు ఆత్మ వెప్పి నడిఃపిసిని వన్నిజ్ నిని గుణమ్కు మంజినె. అయాకెజ్ ఇని ఇనికెజ్ ఇహిజు, మహి వరిజ్ ప్రేమిస్సాన్, సర్దదాన్ మంజినాన్, సాంతి సమాదనమ్దాన్ మంజినాన్, కీడు కిత్తిజ్బా అయాకెజ్ ఓరిసి మంజినాన్, కనికారం తోరిస్సాన్, నెగ్గికెజె కినాన్, నమ్మిదెజ్ తగ్గికాన్, సార్లిదాన్ మంజినాన్, సోస్ఎండ మంజినాన్. యా లెకెండ కిజి మంజినికార్, ఇని రూలుజ్బా తవ్ఎర్.

24 క్రీస్తుయేసు వెట కుడిఃతి మనికార్, వరి పడఃఃయి బత్కు, వరి సెఇ ఆసెజ్ విజు, సిలువాదు కుంటిజాణిజ్ డెయె ఆతి లెకెండ మనాద్. ఇహిజు వారు అయాకెజ్ పూర్తి డిఃస్త సితార్.

25 దేవుణు ఆత్మ మజి కొత్త బత్కు సిత మనాన్. అందెజె దేవుణు ఆత్మ వెప్పి నడిఃపిసిని వజ మాటు బత్కిదెజ్.

26 మాటు గొప్ప పెరికాట్ ఇజి గర్ర ఆవిండ మహి వరిజ్ కోపం రేపిన్ఎండ, గోస ఆజి సెఇకెజ్ కిఎండ ఒరెన్ మరి ఒరెన్ వన్ని వెట మండ్రెజ్.

6

1 తంబెరిజాండె, మీ లొఇ ఒరెన్ తపు కిత్తిజ, దేవుణు ఆత్మ నడిపిసిని వజ నడిజిని మీరు సార్లిదాన్ వన్ని తపు దిదిజి, నెగ్గి సరిదు తతెజ్. మరి అయాలెకెండ, మీరుబా పాపమ్దు అరెండ జాగర్ర సుడెడెజ్.

2 మహి వరి బాదెజ్, కస్టమ్కు నెసి వరిజ్ సాయం కిదెజ్. యా లెకెండ కిజి క్రిస్తు వెప్తి రూలుజ్ మీరు పూర్తి కిజినిదెర్.

3 ఎయెన్బా వాండ్రు పెరికాన్ ఆఇతిజ్బా, గొప్ప పెరికాన్ ఇజి ఒడెబితిజ వన్నిజ్ వాండ్రె మొసెం కిబె ఆజినాన్.

4 విజెరె ఎయెన్ కిజినికెజ్ నెగ్గికెజ్నా సెఇకెజ్నా ఇజి వాండ్రె సుడెః ఆదెజ్. అయావలె వాండ్రు కిజిని దనితాన్ వాండ్రు పొగడెః ఆదెజ్ అట్నాన్. మహికార్ కిజిని దనిజ్ ఆవిండ, వాండ్రు కిజినిదాన్ సుడెఃజి పొగడెః ఆదెజ్.

5 ఎందనిజ్ ఇహిజ, ఒరెన్ ఒరెన్ వన్నిజ్, వాండ్రు కిదెజ్ మని బాజిత మనాద్.

6 దేవుణు మాట వెంజి నెసినికాన్ ఎయెన్బా వెప్తి నెస్పిన్ని వన్నిజ్, వన్నిజ్ కల్లితి మని విజు నెగ్గి వన్నాజ్ లొఇ వంతు సీదెజ్.

7 మిజి మీరె మొసెం ఆమాట్. దేవుణుదిజ్ సుత్రిసి అరెప్తెజ్ ఆనాద్ ఇజి ఒడెబిమాట్. నాను ఎందనిజ్ యాక వెప్తిసె ఇహిజ, విత్తికాన్ ఇనిక విత్తాండ్రె, అయా పంటనె కొయినాన్.

8 ఒడెబిల్ది సెఇ ఆసెజ వజి కిజి బత్తిజినికాన్ నాసనం ఆనాన్. ఎందనిజ్ ఇహిజ వాండ్రు సెఇ ఆస వజి బత్తితాన్. గాని దేవుణు ఆత్మ వెప్తి నడిపిసిని వజ నడినికాన్ ఎలాకాలం దేవుణు వెట బత్తినాన్. ఎందనిజ్ ఇహిజ, వాండ్రు దేవుణు ఆత్మ వెప్తి నడిపిసిని వజ బత్తితాన్.

9 నెగ్గి పణిజ్ కిదెజ్ విస్కిమాట్. ఎందనిజ్ ఇహిజు, మాటు విస్కిఎండ మహిజు, దేవుణు ఎత్తు కిత్తి సమయమ్దు మాటు కిత్తి దనిజ్ వాండ్రు పలితం సీనాన్.

10 అందెజె మహి వరివందిజ్ సాయం కిదెజ్ సమయం దొప్పివలె, మాటు విజెరిజ్ నెగ్గికెజ్ కిదెజ్. ముకెలం దేవుణుదిజ్, నమ్మితి వరివందిజ్ కిదెజ్.

సునతి ఆవిద్ కొత్త బత్కునె ముకెలం.

11 నాను యా మాటెజ్ నా సొంత కీదాన్ నె రాసిన. ఎసా పెరి అనరమ్కాణిజ్ రాసిన ఇజి సుడెఃదు.

12 మహి యూదురిజ్ సర్ద కిబిసైజ్ సూణికారె, మీరు తవ్ఎండ సునతి కిబె ఆదెజ్ వలె ఇజి మిజి డటం వెప్పినార్. వారు ఎందనిజ్ యా లెకెండ వెప్పినార్ ఇహిజు, క్రీస్తు సిలువాదు సాతాన్ ఇజి నమ్మితిజునె దేవుణు రక్సిస్నాన్ ఇజి వెప్పిని వలె లోకుర్ వరిజ్ మాలెజ్ కినార్. ఆహె వరి ముస్కు మాలెజ్ రెఎండ మండ్రెజ్ నె సునతి కిబె ఆదెజ్ వలె ఇజి డటం వెప్పినార్.

13 సునతి కిబె ఆతికార్బా, మోసె సితి రూలుజ్ విజు లోజిఎర్. గాని మిజి సునతి కిబిసైజ్ కోరిజినార్. ఎందనిజ్ ఇహిజు, వారు వెప్పినిజ్ మీరు సునతి కిబె ఆతిదెర్ ఇజి మహి యూదురిజ్ వెప్పి వరి నడిఃమి పొగిడెః ఆదెజ్ సుడెఃజినార్.

14 గాని నాను, మా ప్రబు ఆతి యేసు క్రీస్తు సిలువాదు మా వందిజ్ సాతాన్ ఇజి ఆవిండ మరి ఇనిదని వందిజ్బా పొగిడెఃఎ. వాండ్రు అయాలెకెండ సాతిజ్, నాను గొప్ప విలువ మనిక ఇజి ఒడెఃబిని దనిజ్ యా లోకమ్దికార్ విలువ సిఎర్. వారు విలువ మనిక ఇజి ఒడెఃబిని దనిజ్ నాను విలువ సిఎ.

15 ఒరెన్ సునతి కిబె ఆతాండ్రా, సిల్లెనా ఇజి ఆవిద్ ముకెలం. ముకెలమతిక ఇనిక ఇహిజు, ఒరెన్ పడాఃయి బత్కు డఃసి కొత్తాజ్ ఆతాన్ ఇజినె.

16 యా మాట వెంజి అయా వజ కిని విజెరిజ్ దేవుణు వన్ని సమాదనం సీజి, వన్ని ముస్కు కనికారం తోరిస్నాన్. వీరు ఎయెర్ ఇహిజు, దేవుణు వన్ని వందిజ్ ఎర్లిస్తికారె.

17 ఆకార్దు, ఎయెన్బా నజీ మరి బాదెజ్ కిమాట్. ఎందనిజ్ ఇహిజ యేసుజ్ సేవ కిత్తి వందిజ్ నజీ కిత్తి బాదెజ మనెజ్ నా ఒడొఃల్దు మన్నె. యాకెజ్ నాను వన్ని వెట్టిపణి మణిసి ఇజి తోరిస్సె.

18 తంబెరిజాండె, మా ప్రబు ఆతి యేసుక్రీస్తు దయ దర్మం మీ ముస్కు మనీద్. ఆమెన్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c